



皇明都察院司務無回沈公墓表

嗚呼此都察院司務錢塘沈公無回墓也無回名  
守正字允中而海內外風期相慕好與讀其著述  
者耳目無回最習故無回最著厥考烟江公好奇  
精六壬遁甲祿命之說嘗私識巾箱某年我當生  
子某年鄉舉其元配孫孺人聊蕭之而子也舉乃  
公嶽嶽格應封是時烟江公年五十矣蓋戲之也  
孫母推擇中表之宜子者佐造得姚孺人而無回  
生十五齡見賞於督學蘇紫溪先生爲文鏃鏃無

能不新更茗柯有實理尤喜古文詞與黃貞父胡  
休復諸名流相友善爭砥文行互相雄長二千石  
季公就衙齋設經帷俾其子弟從之無回不自作  
達季守不敢以師帥有加於青青子衿辛卯烟江  
公卽世又浹一紀始中澗江鄉試則癸卯也發故  
篋視之良信先一年決科無回放落今行河上愚  
朱大司空知錢塘爭之學使者沈生才品崢嶸澗  
中無輩卽與生角菀當莫之先也入闈果擬第一  
竟冠本房朱公爲尹不識無回而薦之強無回名

下士不接贊神明宰君子以是知兩君誼至高能  
相與有成也秋當計偕無回獨鬱鬱念先人賫志  
歿不及見子成名馬鬣之未封吾豈忍先紫函泥  
金後白楊埋玉乎遂合所得坊幣諸費大治窀穸  
公卿祖道繞朝贈鞭無回不顧也度無回得舉齒  
不少矣所急在此所需在彼功名富貴故曰我所  
自有視熱衷鍾鼎澹泊松楸相去豈直星淵乎哉  
古稱孝廉如無回名中其實矣武林天下形勝處  
也轂軸縮四方之奏勝流軒蓋無不無回爲歸無

回弘獎風流許與氣類苦心之經義緣情之篇什  
滿帟之雲烟載筆之序記碑板與夫花之朝夕之  
月庭之草門之雪有寸香無算爵我無所不踟躇  
人無所不滿志暇則擁梧吟攤書讀上下千古淋  
漓磅礴破前人之孤憤笑豎子之成名栩栩然神  
王也性好急人之難其經紀友人周谷王後事備  
至休復胡太史歿京邸刻遺文躋廟祠至忘其疲  
每對予言輒蘇蘇隕涕閭里親串日中決疑夜半  
叩門不以不關切爲解郡國守相過從請益直指

李公按漚時時折柬諮詢無回益自發舒所條上  
濬河積米防倭練戍諸議多采而見諸施行所薦  
名人與所脫重獄所陰爲之地者若而人無回口  
不言其人今或未之知也丙辰用乙榜領黃巖教  
諭黃禪海牢山風氣敦塞無回整齊模範謹持啣  
勒日進諸生講說文義霞城大爲興起異時學田  
可八百畝飽奸胥豪佃腹無

金積伏匿盡

出雀鼠暗屏而民間不驚台卒譟海澨前郡守丞  
蓄縮一不任孰何道路以目予承乏備兵單騎上

道中丞蘇公爲予股栗予延見官吏無回從廣文  
伏謁予私計劇孟在此七國亡憂況得無回乎與  
目成去不半年予儲死士懸賞格設方畧解株連  
大奸距脫禍本芟除無回默贊居多中丞上功簿  
幕府稱不容口將借榆關一席地少展壯猷無回  
亦願行間得一當壬戌竟用常格平進助教北雍  
無回生平咄嗟顧盼大有出渝水復襄平意氣在  
黃時時料簡兵事相知間緩頰語予予輒以軹深  
井有老母在微爲勸尼無回默默首肯予言會予  
十月 嵩呼入春明門無回無一日不把臂每得  
一奇鮮輒割以佐酒或至丙夜不倦予性固而執  
無回進之通融予性率而愚無回進之委折予性  
喜遠小人近君子喜踈簡迂僻士畏當路炎炙諸  
大人無回進之包荒使予日近日習夫世法日遠  
日忘其蒙心予亦默默首肯無回言時時仿學之  
殊不似及於無回之幸舍見夫傴僂而趨揖者趨  
趨而不前者軒軒輦上舞者或以竿牘通者或以  
酒食徵逐者無回待之人人意得去予未嘗不廢

然返汗淫淫沾背或通夕不一假寐吾目中未見  
如此人然人生果毅精華畧有裁限計相去不甚  
相遠安能舍此七尺一一供人沾丐夫美先盡也  
已間語無回請少節精神愛日力無回未必是予  
未嘗不默默心服首肯予也予出春明門無幾而  
擬無回填予鄉銓部陳元直缺無回以俸淺破調  
力辭當事稍聽從之終不能舍驟遷都察院司務  
御史大夫殿中諸執法生平雅愛重無回得一周  
旋恨相見晚任甫四十日 上御常朝故事典客

招呼八司廳執揭帖白所辦事是日首事者屬民  
部李桂芳不至無手揭冠本班者司儀不辨白舉  
在事者同被糾御史緹綺中貴趾相鎔於朝房各  
司震懼囁嚅無回直前抗言吾輩失儀當糾首事  
不至當訊他復何問尋得 旨免究友人招飲山  
房天酸然風無回微中濕頭岑岑也歸猶繪絹素  
揮洒自喜未七日而溘然長逝天啓癸亥三月二  
十八日也距其生隆慶壬申二月二日年壽裁五  
十二耳馬鬣秀眉賈彫虎怒悲夫總所著述行世

者經學則書說叢詩說通時菘則桃花塢草北歸  
草博笑草靈鷲山初草二草三草餘草隆化寺草  
經書獲新草詩藝全集遺詩則焚草已庚草遺笥  
稿遺文則雪堂集生平手自刪訂廿一史東坡集  
獻徵錄諸子集與漢宋諸儒辨解語錄百餘卷有  
刪有駁有翼業成一家言而武林不戒於火竟爲  
祖龍攫取盡署中所私存將行於世者古今詩文  
四六經書先正各有選及賦藹說叢說通各有補  
諸書存什一於千百可謂博而且雅矣無回教黃

人比安定在湖文翁入蜀其文多予所手定其詩  
文雋爽出入唐晉引白蘇爲同調其經濟吏材如  
山之疑如水之活如風雨之猝至如鬼神之無端  
侃其議論貫串淹洽言必有中能使痿痺立起而  
最恨標榜之風與夫依倚之習至比之木人不語  
濕鼓不鳴故君子之朋傾倒篤摯而小人之黨亦  
間諭訾此亦眉山氏之餘派也性極嗜畫斟酌倪  
迂米顛運之靈韻然予相知數年竟不能知予之  
不能盡無回也有如此畫矣世俗重進士第非入

格者卽中原麟鳳悉辱之樊籠斂阜羈卬之役無  
回高足濶步張口伸眉空洞無有何止容卿數百  
人人多折節屈行輩尊信之然爲文極工取友極  
廣而不得一列千佛名經何也甫擢栢臺頡頏驄  
馬必少有所自見而千秋之義問方隆七尺之鬚  
眉已往又何也昔人有言才華心性猶如利刀唯  
用割泥泥無所成刀日就損又言千將莫邪虞其  
缺折殆爲無回識耶烟江翁記云名行孔彰子孫  
其昌昌於名行而屈於一第豈非以不盡之樽留

爲後人餘地耶他何其奇中也無回娶謝子二尤  
舍郡廩生卽太史休復公館甥次美舍娶太學陸  
公行仲女繼娶文學敬所嚴公女女一適山東沂  
州二守曙雲林公子尚友孫男二翥宗尤舍出聘  
吏部司務去病卓公子太學漢生公女翹宗美舍  
出未聘孫女二尤舍出未字母姚孺人尚善食尤  
舍予門人也手執友卓先生去病狀求予一言願  
乎其至若苴若泉孝子之容無回忘亡矣夫表者  
標也其人文章可名世則表之學術可經世則表



之風節可持世則表之無回三不朽具是是可表也予何人耶其任表乎哉雖然寶夏后之揭豆者不必炫青黃之飾珍太公之巨闕者無所煩斷刷之能故詳據來狀表其隧道以告來茲使過者必式曰此皇明都察院司務沈公無回之墓也嗚呼欽差整飭台州兵備分巡紹台道浙江布政使司右叅政兼按察司僉事蘭陵通家友弟張師繹克雋甫撰

沈無回先生傳

通家眷社弟李碩頓首撰

予與無回總角同管石迨無回伯霖休復建社西冷予亦肩隨之無回先予得雋而不偶與予同南北風塵淒情樂意未始不共嘗者壬戌之役予濡滯都門無回以內遷至相視而笑謂知己遙集堪適旅懷烏知從此永訣也嗟乎無回已矣其鴻文質行豈其與生俱逝哉亡亦事核於丘閭論定於鄉黨繇今而述之後則閩史之言有徵是為傳

無回名守正字允中庚字無回蓋當世所稱武林  
沈無回者也沈之先著於吳興中徙武林爲吾郡  
望族十數傳而至煙江公好讀竒書精星理嘗自  
筮記曰某年當生子某年舉於鄉名行孔彰子孫  
其昌時公已艾年未有子孫母擇嬪族之中表姚  
字公是生無回無回生負慧質以幼清見竒煙江  
公喜曰鄉也吾筮之殆是見矣方童牙落筆千言  
不竭督學紫溪蘇公竒其文曰是當飛藻高壇寧  
獨上苑之騰倩乎亟拔之童而籍博士益精博士

家言已餼於庠益攻苦旁綜風雅成其雋流一時  
藉藉無回名傾東南之士矣郡守季公設臯比延  
之無回深自簡押絕不干以私守益以此相欽重  
聲施颺起固已駸駸度驂驪而躡飛景已亡何奉  
煙江公諱哀毀過禮竭其力以治喪癸卯舉孝廉  
爲經房冠偶發故牒得煙江公筮訝其神云比當  
借計無回念往以貧不能卜一丘俾先人亡藏所  
幸坊幣可襄大事吾寧忍遺吾親以博儻寄乎謝  
公車不上尋再上再阨而名日益噪文日益豪游

衍則桃塢出王則靈鷲及門之士萃四方轍迹相  
與軼晚近而稱古人講業孳孳不倦暇則捷戶繙  
經竿牘不入公府顧喜究心經濟擘畫時務郡國  
守相多伏謁造請直指李公按浙遇事輒折東相  
問所條答濬河議積米議防倭議兵議鑿鑿可行  
當事多採之及孫母捐栢棖寢苦泣血幾至滅性  
當世聞人素車白馬而臨喪者相望也然廿載賢  
書矚然自砥而平仲之驂北海之座又天性所樂  
故嘗苦貧會丙辰得乙榜遂改慮而謁天官授黃

巖諭巖地磽俗僿人文久闕無回務樂其羣寬其  
教爲之期會而躬督課之以程其能士斐然嚮風  
無回雖師帥乎然特精吏治縣大夫凡疑訟必迎  
而就質成得無回片言立解至於清久匿之田絜  
摘戍之令迄今饗其利勿絕台卒戍海上饜糧而  
驕不饜則譁一歲再脫巾監者亡敢誰何無回爲  
畫策定之繼而夢澤張公備兵海上深委重焉都  
臺石水蘇公稱其經濟真才宏文實學兩咨部院  
載在考功而卒以格例遷國子助教則又趨函丈

立橋門北面而師之者傾天下士適銓務缺當事擬用無回啟事具而以不及格力辭卒遷都察院司務齒於柱後惠文先皇帝御常朝故事八司務遞執揭白所辦事會首事及同班六人俱不至無回竟被糾時御史鴻臚緹綺臨履諸司務相錯於朝房有言併糾諸不至者無回正色曰吾曹失儀當糾首事不至當訊它何問焉事遂寢其曾懷伉直身當利害類如此時方暮春友人邀飲郊外天酸然雨春服微寒歸卽稱病予亟往視猶對予

作繪事曰頭則岑岑然當自愈耳曾不幾日而遽卽世天何尅無回之速也旣嗇其遇又靳其年且不得首丘降割不已甚耶無回天性篤孝事二母一意承驩滫瀡必備服御必適能使兩宮融融忘其爾我生無媚骨居恒高自標持耻與俗物相遭然又勤獎予敦交誼某某後來之秀力爲推轂借之齒牙周谷王物諸子皆未立無回經紀生歿甚至其最幼子則爲比宅而居俟析箸乃已休復亡京邸爲之調家事躋廟祀刻遺文每與予輩語及

雪堂集 四  
不已人琴之感也無回以著作名當世於當世宿  
名壇坫俱嘗鞭弭周旋獨不屑因循寄人籬下所  
誤著梓行者爲四書說叢毛詩說通其手自評錄  
二十一史東坡集獻徵集諸子集數十卷與漢宋  
諸儒辨解語錄百餘卷有刪有駁有翼將彙爲一  
家言而祝融煽虐與室廬俱燼僅存署中則古今  
文選古今詩選賦勳諸書及說叢補說通補而已  
詩有焚草已庚草遺稿文有雪堂集共若干卷  
要以直抒心靈才與法合卓然成家若夫與寄丹

青筆精心匠雖復遠追作者祇游藝之餘事耳乃  
其在諸生則蜚英菽苑在孝廉則樹表人倫在官  
下則流光治行浸假而展其宏轡寧詎知所稅駕  
乎於鄉於宦兩祀馨宗千載而下吾郡有無回矣  
子尤含美含並才士銳意堂構克紹其聲

閩史氏曰予傳無回無回而旣官矣系以字不以  
官重無回也一院務不足重無回也士先志官先  
事事未半而齋志以終官非所以傳無回也雖然  
無回阨一第而生被榮名坳饗血食以彼其事三

公奚易焉橫目者訾其賈聲譽廣交游桃李成蹊夫寧有所致邪語有之名不虛立士不虛附可以

知無回矣

無回先生傳畧

樵李友弟朱大輝頓首謨夫

沈無回浙省會錢塘人也諱守正以文壇中無不

推無回懸書為風雅擅故今無回以字行無回年

少露穎文筆藻思直欲排龍掩鶴文人宿士具推

下之試輒冠軍補餼廩甫壯以癸卯薦賢書冠詩

經房第一藝業日進名籍籍傾傳寓內而上對公

車則輒罷丙辰以乙榜授黃巖學諭七年以傳經

聲實最歲壬戌特擢國學助教益異典也未及其

才望鬱起陞都察院司務甫四十日以病忽焉卒  
于京邸無回文章經濟具足千古都人士無不知  
獨其品地氣誼隱隱負幹世之思足稱一代偉人  
人未盡知者八方其以經生異等爲郡國監司守  
令所禮重爭願以子弟塾辟爲經師時羅致之署  
中席者太守魯國季公也以諸生爲太守重客且  
意示以間可乘便陳民間請屬而因以爲膏晷資  
甚暱也且其家顧食貧時正供孫母姚母兩母夫  
人甘膳亦可以孝養名進而無回于脯事筐篚外

絕不問卽他以懿密請間者亦斥之令無復之人  
未盡知者一至登薦日年亦壯矣以例上對大廷  
發攄其所稽積因乘風雲捷起爲顯揚地亦修孝  
固然者而無回以其父烟江公從辛卯坊後尚厝  
淺土十二年所何心飾車馬膏秣事文言彙征也  
乃便理窳窳務無意上春官時卽計偕吏日勸駕  
戚友以祖道壯弗動也人未盡知者二無回生平  
無襍交交以聲氣洽遂篤深膠漆素與周谷王胡  
休復講德問業相視莫逆風雨晦明聲韻無間後

雪堂集  
卷之三  
谷王旅死不勝同氣之悼爲經紀其後子視其子  
靡替至休復以癸丑第爲翰林庶常亦以病歿京  
邸問至悲之殊甚所爲永蒸嘗梓遺集發其身後  
名爲千秋不朽計者靡不至而父事其尊人元敬  
先生者不減休復在時且加篤焉人未盡知者三  
罷公車後都人士無不借交燕見時以偃室爲外  
帑日伺察而不諱陽鱗進亦通徑也而無回則匿  
影于鷲嶺崖壑間日下帷授經惟覺忽然峯靈忽  
然泉冷海日江潮標其邈蘿陰塔影點其淡而加

以落落胸懷朗朗眉宇破幽徹霽無不深洽而因  
與門下北面英侶參古證今以訂其合蓋似無一  
可喻此樂也卽窺園解帶亦無從一瞰其間何得  
數數見其非公從解華欵段溷輿臺間耶卽爨下  
無欲清之人弗屑也以故時多舉債卽相徵者來  
敗人意亦惟柱頤望西山爽氣不則手丹鉛經史  
籍而已他復何問人未盡知者四家顧舉債而遇  
貧知戚待以舉火者無俟其口發端而亦必稱其  
力與其地以周之凡當士紳間遇公正發憤卽張



髯奮頰若已當其不平必爲伸之然後已所謂夜半相過不以急辭者無其跡而意殊殷而顧不欲以任使名人未盡知者五侃侃直聲夙著江城以故當路上臺每延見問民隱利敝事亦無不披誠以告大都中興革剔釐爲地方喫緊而他不及也人未盡知者六至諭黃巖時獎引被拭大開風氣時當學田八百畝爲豪佃奸胥所飽則爲設法鈎之以入隨分與貧士人授一陌金而首循盤餐正似鄭虔在台時意自適也及台卒兩朞再譟有當

事者責在廣文可謝不與聞而無回則爲郡帥調劑而譁定師儒而可當干城之重人未盡知者七及任助教才賢聲益滿長安道時值銓務缺欲補無回啓事以冷曹當炎局他尚多藉力爲地而不可得無回顧力辭曰驟陞則俸淺不調而陞則格破意若大僚避讓然至任都察院司務入朝時以司務同班者六人俱不至而當公進揭帖白所辦事則責在首事者而時當班行缺無回遂同被糾時鴻臚緹騎臨履朝房同事者捍言某某不至無

回亦可同聲以釋而顧曰吾曹失儀當糾首事不  
至當訊他何問是六人者微無回幾不免而無回  
當事利害不爲沮者類然人未盡知者八時當朝  
路持議中窺無不交賢之會當大用而無回病不  
起矣無回居孝廉便負朝望處散秩便見卿材意  
念良深幹濟時至良可稱江國偉人而今人士之  
推重者多以公車藝公車藝顧足盡無回哉無回  
于徑術經濟類有衡要其所條答濬河議積米議  
防倭議兵議鑿鑿可行業爲當事採所著有四書

說叢毛詩說通行于世平生手自評錄廿一史東  
坡集獻徵集漢宋諸儒辨解語錄百餘卷有刪有  
駁有翼將彙爲一家言而會杭大火盡燼焉可惜  
也所存者說叢補說通補而已無回文極雋夾在  
唐晉間詩亦近是有焚草已庚草遺笥稿文有雪  
堂集共若干卷今其嗣英多梓以行無回性極喜  
畫其法已入倪顛米迂室雖未流傳而風尚殊甚  
誠所謂學問文章之氣鬱鬱芊芊見于筆墨間者  
固當推武林第一卽以藝文論無回亦豈易盡哉

雪堂集  
余交無回晚其訂之友籍也以胡休復故休復在  
雅推相視至休復逝益復引暱所爲鷲峯夜月柳  
堤曉風凡爲申締誼甚深第其陞助教北道時不  
獲一執手歌驪駒至今猶愴念未已誠畏踏西州  
路何忍詮次其大都聊識其畧洗發人士未盡知  
者以見氣類辨香云至傳之史乘風神與金石俱  
溘自有名碩如椽在嗟乎聲跡詎可論天下  
士哉用則中流一壺不用則高原五石瓠耳而其  
大小固自定也一日千秋夫豈易焉今爲無回扼

腕者一第及一用耳顧其雲霞之表江河之澤能  
使其不隨地流章發彩哉雖然美玉明珠良以宗  
廟明堂重而其重則不必宗廟明堂也無回精神  
見于山川者以身茹其美意益無所不至焉藝文  
風節亦其孚尹旁達之一乎而況其于國于朝也  
以日月告且當出門有功之交而官未論也而已  
風論灼灼如是設以雲雷見其昭回于天也不更  
可必乎而竟已焉惜哉此雖曰千人亦見百人亦  
見而無回竟未有一盡也流章發彩大有餘地在

雪堂集 六  
余且持以觀其後無回丈夫子二長君尤舍仲君  
美舍長君卽英多年少材美大有父風云

皇明都察院司務沈公誄

有序

夫誄尊非古也余丈人王小司寇與今崇祀鄉賢  
都察院司務沈公同舉籍余又負笈從公哲長嗣  
尤舍遊茲茲世誼鹵也焉辭昔昔濡毛蹈斯已失  
余圖其大不敢避其細爰灑涕而誄之按狀公諱  
守正字允中一字無回海內外風期相慕好與讀  
公著書者耳目無回最習世皆稱無回先生先生  
由萬曆癸卯鄉進士副丙辰進士榜署黃巖諭陞  
國子監助教晉今官以病卒於京師嗚呼痛哉典

刑云喪志業未充徒拊悵于遺文彌增悲于後事  
云爾其辭曰

洪維宋祖束契四聲吳典甲第代有高名南籍臨  
安聿家錢唐鳳皇之麓佳城鬱藏如有聞後十  
世次皇考煙江卓然樹幟壬遁星命亦靡不造孔  
彰且昌篋記早告維皇妣孫擇姚以貳篤生先生  
人文超異童齡操觚千言未已授經膝頭皇考有  
喜十五列序命賞蘇公鏃鏃新英食餼于宮視古  
植節工今匪辭筆爛星辰心瑩琉璃黃葛吳羅一

時競起休復去病後先媲美至德不孤昆友師師  
友昆之樂庶其有之太守延塾誰若先生署可弗  
扃爰有公評皇考淪亾先生執喪哀情之至天悲  
地傷懷慕一紀孝廉始舉不見皇考不樂如杵爰  
以坊幣營襄大事公卿祖勸堅不謁試舉先一年  
學使擯焉上愚朱公力諍不然朱公莅政先生不  
謁惟未覲見方幅不歇言戒同籍士如處女爲貧  
有疵鐵志焉杼友周之歿諸子未立經紀庶務俾  
靡弗給幼者無居居之始安媿渠翻覆光我金蘭

休復淹淪躋祀傳文時如初歿噓涕離羣鷲峯登  
壇帳屢立滿人師經師秋肅春煖廣心熱腸急人  
如已俠烈丈夫德忘敗恥濬河積米議倭議兵諸  
生直指鑿鑿陳行或表奇文或白奇冤澹臺公道  
殊彼私言公車困久脩脯亦有老母極膳妻子葱  
韭隣黨望火老嫗求埋自飴券責直犯狼豺丙辰  
落乙貧乞教食裨海牢山黃巖風塞開詭文義鉤  
剔匿田貧分一陌哲頌破天台卒脫巾兩朞再課  
彌縫調劑不多告誥惟時遼戍所在騷然巖有先

生乃獲寧安備兵張公事靡不吝中丞再聞亦曰  
我知壬戌下第平進國子推以兵戎母也阻止朱  
公董公高位欽崇啓事銓務辭曰速逢爰補知襍  
介性難悅賊闖時親掉頭早絕會有儀糾相錯捍  
指一再厲聲其直如矢小飲遇雨不能救頭尚繪  
細素以報乞酬逍遙七日竟不可祝一時同朝罔  
不痛哭說通說叢賈人紙貴評次史集計百未旣  
赤帝分之誰不惜之僞交窘之嗣克恬之猗矣尤  
章令德悠長三匝無枝表存雪堂俎豆旣光雪堂

永且彼驕一第渺不足換寄意丹青妙軼迂生迄  
今片楮重于琰璜人之所嗇天予至豐吾師飲水  
回也空空嗚呼痛哉

鹽官後學陳梁撰



誄者謚之哀辭也魯公誄孔子曰尼父前此未  
有父之者父之自魯公始所謂易名者是故曰  
少不誄長賤不誄貴柳下生之妻誄之曰夫子

惠前未有惠之者惠之自其妻始所謂私謚也  
後此臣下誄上者類一千二千言以莊嚴詳盡  
爲得體故曰誄重詩輕誄詳傳畧善傳者節取  
一二奇事表章之善詩者寫其意象而已皆非  
誄體也誄體必有小序存歿呼名弟草草效法  
爲之幸勿罪勿笑 英多開美兩兄教正乃梓  
弟梁頓首附白

祭文  
 天啓三年癸亥三月二十八日都察院司務沈君  
 無回卒於官越五月而其喪歸自燕訃聞於吳吳  
 中友人李流芳以病不及赴明年甲子二月之望  
 始得載酒束芻而為文以奠之曰嗚呼無回詎止  
 是耶兄文章可以名世學術可以經世風節可以  
 持世胸懷度量可以容蓋一世頎然玉立灼然霞  
 舉望而知為福德壽考之相而一第不酬其才一  
 官不究其用乃奄忽至是耶吾兩人之交自庚戌

祭文

李長蘅

天啓三年癸亥三月二十八日都察院司務沈君  
 無回卒於官越五月而其喪歸自燕訃聞於吳吳  
 中友人李流芳以病不及赴明年甲子二月之望  
 始得載酒束芻而為文以奠之曰嗚呼無回詎止  
 是耶兄文章可以名世學術可以經世風節可以  
 持世胸懷度量可以容蓋一世頎然玉立灼然霞  
 舉望而知為福德壽考之相而一第不酬其才一  
 官不究其用乃奄忽至是耶吾兩人之交自庚戌



始傾蓋於燕邸中間吳越間阻聚散不常良晤之期廿年有幾而今遂成隔世耶猶憶受之之言曰酒杯流行無回意態絕似長蘅比訪無回於邸中相視而笑求其相似者而不得也今遂使我爲中郎之虎賁不愈痛耶吾兩人相聚每以卒卒不盡意爲歎公車之役屢約同之癸丑兄以居艱罷丙辰弟復以附舟先發未戌弟皆以病廢終不得踐前約而今遂無合併之日矣可不痛耶丙辰被放羈栖逆旅與兄東西相去十餘里隔日必一相聞五日必一相詣弟先出都門就兄言別篝燈置酒臨分欷歔欲泣別之難如此而今遂永訣耶兄官黃巖三年迨己未之冬以假歸而弟適至西湖始得一握手是夜同飲湧金舟中酒闌忼慨察兄之意有甚不釋然於功名之際者弟竊怪其不達夫世之所爲魏科臚仕者其人亦畧見之矣而區區欲與爲伍嗟乎無回吾知兄之不然也兄蓋欲有所用於世而非苟然者也兄性狷潔不肯名一錢而熱腸如火當人緩急傾筐倒庋而不少恤至以

貧仕爲祿養非其意也然則兄之不釋然於茲者  
非一日矣而竟以此夭其天年耶弟迂踈懶拙無  
用於時似不能爲兄役而兄中心好之又嘗愛弟  
之畫弟泛然酬應不能竭其能事以事兄以此爲  
恨兄晚而游戲筆墨初秘惜不肯示人比間一見  
之氣韻妍妙竟入唐宋之室輒爽然自失以爲不  
可及而今已矣不及見兄之所止矣嗚呼兄卽不  
得大用於時而小艸一出他日宦成優游林下弟  
亦遂將買山結鄰相攜終老子筆我墨子歌我謠  
以酬夙昔之諾豈不樂乎而子竟舍我而逝耶弟  
將誰與爲質耶嗚呼無回以兄之明達其於死生  
之際超然不惑無待言矣生而爲世聞人歿而祀  
於鄉先生之列可以媿夫泯泯而生沒沒而死者  
矣況有令子翩翩競爽將光大兄之服而代兄色  
養之所不逮兄其可以瞑耶雖然亦可悲也已言  
叙平生以佐一觴填胸塞膺莫知所次無回無回  
其知之耶尚饗

都察院知雜御史無回沈公行狀

嗚呼予忍狀吾無回哉予於諸君子性質最菲薄

不啻鼓腰龍尾然皆所友事也季思玉折於孝廉

延之蘭摧於郎署谷王星隕於旅人道載金銷於

野伏直至休復讀書玉堂吾黨差足吐氣而降割

一朝邈焉千載譬之剝膚剝腹勢已迫身不第廓

落生悲抑且形影共痛矣去年與子往無回旅寓

長安緬思往昔止此三人聚首逐塵更相憐惜而

而無回較常時蟬連往復多作諄諄語殊不似其

生平一往直前之氣予固竊疑之詎意爲別未幾而訃音至矣嗚呼痛哉藐孤尤舍迎櫬京邸惘惘長途顧從血淚中撫行略走一介二千里至汴以求狀其先人也予不文安能狀無回雖然藉手一乞大人先生之地下地上以發摠無回之未竟而慰籍孝子之無窮予又何敢辭按無回先世甲吳興而譜藉無堅基可據以南宋中興藉臨安家錢塘爲始鳳皇山麓鬱鬱葱葱者其始祖墓也嗣後代成望族亦間有聞人凡數十傳而至厥考煙江

公煙江公好奇壬遁星命之術都所精曉嘗自譜命記於篋曰我某年當生子某年舉於鄉名行孔彰子孫其昌公元配孫從旁斬之曰而子得舉封公嶽嶽矣煙江公不應是時煙江公年已五十矣孫母推擇嬖族之中表以字公實生無回今姚母也無回生而玉雪可念甫操觚千言不竭煙江公喜曰是見其有以當我哉年十五督學紫溪蘇公竒而拔之已廩於庠爲文鏃鏃無能不新而更茗柯有實理尤慕古文詞上自姚姒下及百家筆記

腹笥大者供雞壇而出其緒餘以充牛鼎無不作  
合當是時黃貞父葛屺瞻兩先生以文行相砥爲  
人士所宗而一時吳伯霖羅玄父諸先生又相與  
起之無回俱發名友善諸公亦皆人人托風期舉  
心契也最後與胡庶常休復交而予亦與焉無回  
庶常兩人同庠序共菘業敷文析理相娛也砥行  
礪節相許也顧休復一切以低眉垂手接人而無  
回時作青白眼向之人皆稱平焉一時郡國守相  
爭相欽遲式廬延塾共願得交兩先生幸甚無回

館於郡守季公休復後館於督學饒公兩兄固不  
事作達兩公亦不敢以師帥加兩兄令君行可吳  
公嘗語人曰如兩生在公署者開門可也辛卯煙  
江公沒無回執喪情禮備至又浹一紀癸卯而舉  
於鄉發煙江公故篋記視之果然無回固稱雋黷  
乎而神檢高匪於世所指遊鱗聚蟻輩一切涕唾  
不比於人陽慕無回者亦若春風拂面當時輒消  
以故無大氣力援引無回先癸卯一年錄科竟不  
收是時御史大夫上愚朱公知錢塘慷慨言於督

學曰沈生行文錚錚不可失也卽以時藝程沈生  
一榜未之或先也入闈果擬解首竟冠本房朱公  
爲政薦不識面之人無回爲諸生有不投贊之長  
吾鄉至今兩稱之無回舉孝廉時年已非少顧獨  
念先人賚志以功不得見其子舉一名而今尚在  
淺土吾豈忍先金泥而後黃壤此年竟絕意公車  
以舉薦所得坊幣襄大事焉公卿祖行有司勸駕  
勿顧也距今稱孝廉廿年介介自守毫不可干以  
私然出自天性自二千石衙齋時便已如此且誠

一二所知曰士初進猶處女守身也貧困吾素吾  
儕第忍之母爲輦上君子所窺諸君子相戒幾不  
欲以一足入偃庭未幾而大宗伯有綜核之事凡  
爲無回所誠者俱得免於評論此固諸君子所自  
洗濯然設之者無回也周谷王功諸子皆未立無  
回經紀生死甚至次子最幼爲隣宅而居俟析箸  
乃已休復坳于京邸無回以不得親視含殮爲恨  
躋廟祀刻遺文調家事皆無回力也而追念平直  
感懷存沒至今歛嗟不衰武林轂軸四方無回以

人師經師據壇驚嶺弘獎風流許與氣類拱葉負  
墻歲常滿百人苦心之經緣情之詩滿紙之文載  
筆之記與夫夕月朝花庭草門雪有寸香無筭爵  
我無所不踣躅人亦無所不滿志暇則獨扁一戶  
明晤騷屑或穴窺之則其神已栩栩遊於康成輔  
嗣間矣無回又廣心熱腸急人之難甚於巳日中  
決事夜半過門者時時不乏郡國守相亦多伏謁  
造請直指李公乙卯按浙時有事輒以折柬相問  
此直指虛心亦孝廉異數也其所條答濬河議積

米議防倭議兵議鑿鑿可行當事多採之而無回  
藉是益得發舒以文字薦名者若而人白寃狀解  
縛者若而人其於諸生講德問業外爲之調劑其  
家庭治辦其衣食且周旋其患難於是諸生人人  
喜甚相與言曰人謂先生固先生固而通者也人  
謂先生通先生通而固者也此實錄也無回久困  
於公車所得修脯老母極膳妻子不能奉葱菜顧  
性好施予人有急叩輒應幾有鄰家望火老媪求  
埋之意而杭作尚華綺燕會率豐性又愛慕光景

不能寂寞故無回常苦貧債家不以無回故稍寬  
逼迫會丙辰中乙榜遂謁選黃巖教諭巖故禪海  
而牢山風氣尚塞無回整齊規矩開說文義一方  
大爲興起說者至比於安定在湖文翁入蜀不虛  
矣教諭職掌文墨而無回吏事特精經濟滿手學  
田八百畝向爲豪佃奸胥所飽則爲設法鉤之伏  
匿盡出而人不驚是時貧士人分一陌金至有持  
而泣者曰吾雖貧豈一陌是爲蓋深慨夫沉匿之  
忽清而積奸之一掃也台卒脫巾兩朞再課則爲

郡帥彌縫調劑之而乃克底定摘發遼戍所在騷  
然巖獨用無回議擾而不害備兵使者夢澤張公  
深相知咨商在諸郡邑右都臺石水蘇公一稱宏  
文實學宜充史席一稱經濟真才堪寄邊事兩咨  
部院載在考功亦不可謂不知無回者矣壬戌下  
第竟以格例陞國子助教先是才無回者欲授以  
兵戎而無回亦感憤悲壯慨然有出淦水復襄平  
意予輩一二相知念有老母在每陰爲阻止而當  
事者亦不欲遽授以助教前知錢塘朱公適爲太



常卿故與太僕董公見龍皆從典銓起家乃相與揚言於銓司曰以無回才何等不可者顧國學自是平進耳奈何又靳之當是時微兩公言不知置無回於何所無回用是聲益震凡相見者皆歎曰如此官者浙河之外數人而已未幾而銓務缺卽欲補無回啟事具而力辭曰驟陞則俸淺不調而陞則格破兩者俱非所以愛某也然竟遷都察院司務爲今官御史大夫暨殿中諸侍御無不傾蓋無回以爲相見晚任甫四十日耳今被召上御常

朝故事八司務廳公進揭帖白所辦事而首事執揭帖者與同班六人俱不至無回遂同被糾時御史鴻臚緹綺臨履諸司務相錯於朝房同事者得言某某不至奚不糾無回曰吾曹失儀當糾首事不至當訊他何問焉一再厲聲皆逡巡退六人者微無回俱不免矣此一段剛正婉委氣象卽錢若水欲與知州陪奉贖銅者何以異哉數日事解友人邀飲於山莊時三月廿有二日也是日天酸然雨無回微中風濕頭岑岑然猶繪絹素揮灑自

喜未七日而無回溘逝矣痛哉無回行誼見於諸  
生教化見於巖學立朝風度見於四十二日司務  
文詞經濟隨地而吐皆足以濟物經時不可指繫  
所著有四書說叢毛詩說通行於世紙爲之貴平  
生手自評錄廿一史東坡集獻徵集諸子集數十  
卷與漢宋諸儒辨解語錄百餘卷有刪有駁有翼  
將彙爲一家言而丁吾杭大火無回著述一朝竟  
與室廬共盡可惜也署中所存者古今文選古今  
詩選賦欒諸書笥中所存者說叢補說通補而已

無回文極雋爽在唐晉間詩亦近是間有雜元白  
體者有焚草已庚草遺笥稿文有雪堂集共若干  
卷性極喜畫其法已入倪迂米顛室顧苦無暇日  
尚不爲其所掩然山谷所謂學問文章之氣鬱鬱  
芊芊見於筆墨間卽不甚精工固當推武林第一  
無回家故貧更燬於火生平所舉債不貲今且逝  
矣老母弱子相顧瑩瑩不識作破券解者竟爲何  
人然尤含才雋士足以自致青雲且慨爽有父風  
固以負荷析薪自矢矣公名守正字允中更無回

雪堂集  
生隆慶壬申二月初二日辰時歿天啓癸亥三月  
二十有八日戌時中萬曆癸卯科鄉試元配謝氏  
子二長尤含郡廩生娶翰林院庶吉士休復胡公  
女次美含娶太學行仲陸公女繼娶文學敬所嚴  
公女女一適山東沂州二守曙雲林公子錢塘庠  
生尚友孫男二翥宗聘不肖康之孫女長男太學  
生向之女也尤含出翹宗美含出孫女二尤含出  
俱未聘字嗟乎無回志在古人才亦豈不如古人  
迹其所概見千秋百代在在可以不朽而十上徒

勞一戰不霸八品之官一畝之官尚不能守也天  
之報施何如哉世俗重一第非一第而伸眉開口  
者强者怒言弱者怒色相知者亦多拂意無回氣  
岍旣高才情復大高步闊足彼欲私矜一第者竟  
不能毫髮漂無回無回坐是友道日廣魚書馬驛  
不廢往來而目懾者又曰此曹子什五賣聲譽自  
相貴耳恒以交游太多中無回夫擊目而神詡片  
言而色飛彼其相視莫逆亦自有故未可與他人  
道也交游乃朋黨別名歐陽子所謂尋之無迹思

之可惡惟此最足以謗君子此蚍蜉撼大樹又何  
難焉予與無回辱在知己顧予交無回最晚自己  
酉入長安十九在外離無回最闊微言軼事多不  
能曉率爾不文僅以貌其形似而已若拆骨置肉  
點額加髭使神明煥然世見典刑者則有大人  
先生之名筆在不肖敬爲藐諸孤振動請焉

姻社弟卓爾康頓首撰

杭州府仁錢二縣三儒學廩增附生員嚴之輅丁  
奇遇凌元徵等呈爲公舉鄉賢用修人範以

崇祀典事竊惟聖學始興卽肇先賢之祭敬心匪  
作自存畏壘之虛若夫人則遺賢官則遺化朋友  
傷心於文字湖山拆契於風神豈肯歸之太虛任  
之千古而舍此有言之口默焉不請耶則故都察  
院司務沈無回先生名守正者鄉賢崇祀振有求  
焉謹按先生爲人玉雪秉意天雲舉止尊華見魏  
舒之領袖貌心同徹散衛玠之膏肓靜對詩書內

雪堂集  
有明珠淵湛動懷民物中涵玉尺衡空幽獨自見  
者踽踽之澹臺當世望之爲巖巖之孟子生而蕙  
蘭可念長則松栢無依少年落筆千言窮飄穎穗  
壯歲寒檠萬卷久結茗柯以故十五遊庠已登廩  
額三十試棘纔領鄉書在宅人壯心始就將情馳  
上苑之花乃先生永感方深竟莫勸公車之駕一  
則以癸卯之名先書遺篋恨于公不待高門一則  
以辛卯之櫬已接新支痛風木尚搖淺土故願封  
馬鬣息驂影于長途喜忍泥金買黃壤于薦幣蓋

鹽如故惟豐養母之羞書幄不開日有印茗之屣  
靈峰手植高桐彷彿倪迂路口客來步景行之行  
鶯嶺幃飄香霧依稀張楷市前人過落高山之仰  
康成微義書殘柳帶蒲編輔嗣清言洒滿庭花堦  
雪愛深桃李日添無言之蹊誼重淵雲常負有情  
之擔喜先生者曰先生固而通敬先生者曰先生  
通而固豈意先生十上空勞一戰不霸黃巖設鐸  
望比文翁徒卜貧儒之一泣渝水急人虛推定遠  
竟還國子之三鱣以守格而讓天曹空具山濤之

簡進栢臺而執黃卷再美弘濟之官履錯緹綺猶  
抗聲而救同列邀臨山館竟廻駕而失斯賢此誠  
慘人意地亂我心曲者矣先生一生爲文自命友  
道弘推登壇坫則黃貞父葛水鑑諸前輩同爲郡  
中祭酒托心期則卓去病吳子往諸契好殆稱今  
日風流若夫聲價相依則休復無回共有南金之  
貴感傷連集則玉堂烏府雙消如玉之人乃其氣  
誼一腔經濟滿手輟食于谷王之訃痛失良朋爲  
之經內外紀死生存幼孤俟其析箸遺恨于休復  
之含不能親視爲之躋廟祀刻遺文調家事繼以  
婚姻宅如日中決事者妙若絲綸之剖夜半過門  
者有同水火之求以孝廉而紆憂直指則議濬儲  
議防禦鑿鑿可行以廣文而借策兵巡則定閭左  
定脫巾人人獲庇奈何有大用而不伸以清官而  
卒世晚年入畫自寫摩詰之詩臨歿揮毫猶剩習  
家之景所著有四書說叢毛詩說通久已紙聲貴  
重未刻者詩文二選賦藹諸書尚畱笥底飄零其  
他著述有百餘種而忽逢回祿竟付封夷天道難

測奪其文復奪其身心可知思其賢必思其祀  
伏乞天臺俯采輿言聿修盛典崇以廟祀能生俎  
豆之光真是鄉賢不愧清歌之聽不勝踴躍上呈  
須至呈者

欽差浙江按察司提督學政副使孫 批本宦正  
學砥中流之柱直躬留古道之遺詞賦知正始之  
在茲經濟以天下為己任鱣堂雅化感李蹊而穆  
然情深鷺嶺遺馨手桐陰而脩然韵遠風流邈矣  
典型猶存誰登著述之壇寧愧豆籩之典仰府即

行縣擇吉製主送入鄉賢祠繳

天啓四年正月 日具呈生員嚴之輅 陸之越

丁奇遇 高德基 沈澹思

凌元徵 吳文熾 陳義適

翁鴻業 許文岐 翁駿業

錢受益 蕭允升 馮 悰

聞啓禎 嚴調御 鄒質士

邵 幽 邵 洽 孫 琮

陸鳴時 虞宗瑤 龔五猷

張岐然 張 墉 陸鳴燧

沈洪瑞 吳思穆 張元徵

江 浩 孫濟奎 王克家

周 邁 徐世濬 陳 政

卓人月 丁允和 王克承

王時珍 陳昌遇 錢喜起

胡餘慶 錢 瓚 周 迨

徐建賓 李世清 凌陽徵

凌吉徵 仲 震 張亦臨

柴世培 陳 濬 柴世竣

胡自清 鄒鍾秀 施 槃

邵時可 孫之琮 吳洪光

尚爾昌 畢登賢 尚明揚

凌熊徵 姚世熙 翁開之

邵文甲 徐 灝 胡貞開

吳文英 吳毓晉 沈好問

柴紹炯 胡胤端 錢肅起

虞宗玟 許肇文 牛斗星



沈昭遠 金士組 錢奕起

陸有繩 何其煒 鄭超宗

高其珍 王克昌 江若鏡

何其煥 張之杰 陸之超

嚴之麟 嚴大順 高鼎燾

鄉賢木主後小傳

無回先生諱守正錢塘人藝苑懸書久江南北士

無不業無回先生經傳疏故以字行先生卅歲補

郡庠諸生隨以試高等受餼登萬曆癸卯鄉薦中

丙辰副榜署黃巖諭天啟壬戌陞國子監助教轉

都察院司務以病卒於官先生篤孝友敦氣誼少

知名多賢長者游登薦時壯矣傷父煙江公骨厝

淺土便謝公車對親杯封樹事併謝是春計偕給

嗣開絳靈鷲惟以羔雉資養母甘隤竿牘不一及

邦邑不給卽賞以佐素以畫自娛絕不輕交交有  
急如身戚焉經紀其友周谷王胡休復喪事家事  
終身歎噓不衰遇公正一發憤排解若不自已出  
攻詩古文詞頗經學非漢宋疏不得解會汰以傳  
尤長經濟畫所條荅濬河議積米議防倭議兵議  
鑿鑿可據卽以教士有安定聲鉤學田定譟卒制  
臺以下咸欽其堪寄邊事當路方倚大用逮補知  
襍御史不再朔以入朝班序缺爲察任咎隨感疾  
不起朝路里門無不悲悼殊常感云所著有四書

說叢毛詩說通焚草已庚草遺笥稿雪堂集若干  
行於世皆

天啓甲子孟夏朔日同里門人柴世基頓首百拜  
識

黃巖縣儒學署諭事沈無回先生碑

孤旛去委羽口二百餘里其聲聞直且暮共靈潮  
噴薄時有孝廉陳君振琦施生商侯黃生學知沈  
生日升盧生應抃葉生梟者走爲余稱邑博士師  
沈無回先生嘖嘖不已於誦予聞先生蓋武林之  
以文行巍望冠當世者也先生以萬曆癸卯舉於  
賢蚤挾英雄之姿未遂風雲之遇由丙辰乙榜爲  
黃弟子師夫建學尊師國家風化之首典甚鉅且  
殷也高皇帝迅掃羶腥玄黃之血清於歸馬橐

雪堂集  
弓之餘首建學宮以禮樂詩書廣勵海宇之豪傑  
而豪傑之維地而擎天者無不從此中奮躍卽如  
吾浙之忠肅文成兩公爲國家安社稷臣能越此  
而龍翔而鳳翥乎則師之高而倡者尊而朝廷  
所爲尊若師者異日之公輔行倚賴之矣無何寒  
氈寂寞壯節欲銷而西河河汾之鼓鑄爲醇儒經  
術帝臣王佐者都無所蒸變此豈師之權薄則以  
其人之無能爲師尊也先生逸韻神標龍文鳳德  
隱樸芝眉有璧潤珠圓之親而高識偉議手畫河

山豪爽風流英英快絕清標玉映介操冰塞憂時  
感事慷慨論列請朱之劍借張之籌尤令人於鯨  
翻蜮射之世見其膽畧洞豁胸期忠信能截洪流  
而建地柱卽一制舉義剗畫心靈建標一代灌溉  
南宮之人數百輩乃身困公車掩關靈鷲蛟宮虎  
窟之險電激霜飛之態與夫魑魅之舞腐鼠之嚇  
無不歷嘗之耳目而五車之胃愈雄東觀千頃之  
波彌洽重淵曾不聞其叱咤虎嘯之氣磊塊擊石  
之感與多士言依於忠孝行敦廉節譚經課藝月

必兩朝會以供饋諸生至諸生之家無擔石身嘗  
見肘者尤緩急之婉委經畫學故有田八百畝其  
歲入爲鼠雀耗盡先生不壯其酷卒請之以爲膏  
焚筆潤之藉而一銷其脂韋繞指之習以故黃三  
年來懷仁秉義蒸蒸色動且淵雲之染能藻挾丹  
黃氣誼之親可當陳董賈先生之偉謨令德初動  
於黃茲當入大廷時前席之召將高議石渠天祿  
之上東望赤城越在絕國多士遂能忘吾師耶先  
生肝膽臭味皆命世大賢何有於黃之多士今當

國家多故之時行以身繫天下之安危若裴晉公  
郭汾陽與吾浙于王兩先生又何有於博士之故  
地惟多士之不忘其師與先生功業文章之初奏  
也則勒石而永之以見官之以人重也庶幾無負  
高皇帝銷兵建學意云是爲記時

天啓元年歲次辛酉九月中浣日

賜進士出身兵部車駕清吏司主事永嘉劉康社  
頓首譔

先府君行實畧

嗚呼痛哉人卽抱失恃之嗟而孰若不孝孤慘  
烈也者先大人中秋之官不孝侍送虎丘父子  
嗚咽不能出一語怪之不意九閱月竟長棄藐  
孤也痛哉生不湯藥歿不含歛不孝不可爲子  
不可爲人生不如死矣屬王母姚七十有八風  
燭高堂諸長老教督不孝卽顛蹶踊擗以死益  
無以安王母而彌不瞑先大人目轍復苟延視  
息蹠奔路宿哀至而哭哭已復慕皇皇窮窮庶

雪堂集  
幾得於言行而生也晚識闇資陋楷摹想像未  
匝十年痛哉先大人有孤猶無子也顧存什一  
於千百弗敢妄也痛定收血號呼舟中望靈輻  
於北道追模範於杳冥且泣且書恍惚昏迷尤  
無倫序憶先大人居平言寒家祖籍汴京自扈  
蹕至臨安始祖文通公以皇祐元年舉進士第  
一人官翰林學士避元兵徙居吳興稱望族隱  
不仕者五世至我

明洪武年復入錢塘之園前里卽今鳳凰山麓祖  
墓凡三傳而爲高祖景東公祖妣羅孺人生曾  
祖醴源公祖妣顧孺人生二祖姑祖妣陸孺人  
生三丈夫子長卽祖考烟江公也家世以孝義  
顯至醴源公而三罹攸鬱之災凡居積之在吳  
淞者一烘而盡而醴源公素豪詩酒先業遂頽  
迨祖考烟江公復以俠烈自命嘗讀書於華津  
洞中通五經未卽得其奧至割臂自勵先王母  
嘗爲不孝道之以矢童子志先王父因是窮鬼  
神之秘發天人之藏嘗私識巾笥云當以申年

生子卯年發科昌名行榮後人祖妣孫孺人生  
姑母之適邵者又以曾王母陸之中表今王母  
姚爲副卽石門望族而不卑側室先舉一女卽  
曰嬪于王之姑也王父年五十八生先大人翁  
宇英異甫操觚千言不竭十有五見知督學使  
者紫溪蘓公奇而拔之遂露頭角每出步履不  
苟里人咸指目焉自食諸生餼時遂不肯咕嗶  
帖括以逐時趨雖過目成誦而手不停披讀經  
研史期適於用酷喜宋東坡先生文簡彙搜攬

輯集得全而手較梓之挹蘓之精出緒餘爲制  
藝獨杼性靈絕異時趨超超一時郡二千石季  
公諱東魯延之塾以課子弟當其時髫年時髦  
爲太守西席曾不及戶外事文行之譽亦擅一  
時矣辛卯丁王父艱其治喪也瘁心竭神竟至  
毀性遠近莫不誦悅歷甲丁數科或試或病至  
癸卯錄科而遺先大人素感憤士子喜執羔雉  
遊大人于薦牘以媒其身者矢志素不干人開  
口亦復誰向自分棘闈外矣而行河大司空朱



公上愚時爲邑令未半面翻以見多薦於饒文宗曰士文行若沈生不可失也卽以藝較元魁可券也而先大人未之知也聞中果擬解不果遂冠經房爲虞山紹虹徐公所拔通榜稱得士云是年卽不上公車曰吾父未葬也當路勸駕具道理恒費而辭曰吾不敢冒昧弓旌之典營窀穸也其不以熱中移至性類如此故事孝廉有所欲白當路得同儕公言之而曰君子固窮吾聞士初進猶處女守身也竟以徑節自矢諸

孝廉遂爭自標尚不以札入公門齒里中事亡何而有撫按許覈宗伯汰畱之議增布功令先大人同調者都超然免評論先大人詭所知曰吾不獨爲固也然郡邑例收縉紳孝廉子弟之應童生試者先大人必先友戚若門生之才且貧者曰彼才不虛吾薦彼貧非吾莫與薦也今以薦起家者繁列若林而嚮風之士埒於問業有不遠數千里者從遊日至爲壇於靈鷲山房士則益衆願亦益紛質疑請益而外爲之區畫

其家庭辦裕其衣食甚則周旋其患難嗣是錄  
童生勢不能周則又爲之宛轉居間俾才而貧  
者無望棘而躑躅人皆喜出望外羣相謂曰人  
謂先生固固而通者也人謂先生通通而固者  
也蓋聲價彌重院道郡邑多式廬而請地方利  
病知無不言而毫不可干以私三十年如一日  
也屢別公車至丙辰復厄甲科而冠乙榜得除  
黃巖縣教諭比之官及門士仍不遠千里而從  
其乏困者資館穀佐舟車力屢殫而不倦萃黃

巖諸生若童生日課而月省之都試之日親握  
管爲之唱以示之程爲具酒食以洽其情而繼  
其匱久之微獨子弟殷殷父兄焉依而風俗儉  
僿竟爲丕變文亦雲蒸霞爛爲旁邑冠迨解組  
弟子爲去思之碑比於文翁之教蜀云憶在官  
時郡邑相欽慕者曰先生修脯無所較育士多  
所損奈何乎繼吾將以某事爲壽先生毋爲拘  
拘然第以亟名詔之先大人在學言學爲固不  
爲通終謝之矣先大人畱心經濟每讀史或考

攬往昔必窮極其得失之林以徵行事壯年不  
得志多託之書存其論以俟後人不幸通國厄  
於火架笥所藏大半作焚書今所存獨濟河積  
米防倭諸議其見諸行者纔二三事可考也官  
黃五載值海盜將意兵心多所未協幄算匪良  
悅中時有嘗先著軍民兩利議海門兵餉議惜  
未見用兩碁兩譁則先大人爲郡帥彌縫調劑  
而刻底定迨摘發遼戍天下騷動黃用先大人  
議騷而不害兵使者張公夢澤深相知詢諮商

訂在諸郡邑右撫臺蘇公石水一稱宏文實學  
宜克史席再稱經濟真才堪任邊事兩咨部院  
載在考功未爲不售矣惜乎未竟用也抑嘗小  
用之廣文卽不與吏事而學田八百畝果豪個  
之腹實奸胥之橐衆願窮竟而置不問第清丈  
坵段更置個人區擬以歸赤貧士某某等百三  
十餘人而田亡寸壤匿盜置義學田百畝以膳  
貧童生寒士無突無烟者向之豪佃奸胥得免  
於禍亦神君父母之戴矣痛哉先大人足爲用

奚而終不一展其用至此極耶壬戌陞國子監助教不半年遷都察院司務故事吏部都察院司務率同官改調不徑陞重其選也初以先大人補銓部陳劔華先生缺啓事具而力辭謂俸則淺謂不調而陞則破格事已而徑陞憲院猶破格也蒞任甫四十有二日御史大夫暨殿中諸柱史無弗傾蓋相推崇相與講求佐

聖明破士紳同異輓極重於萬一議將洽會上御常朝故事八司務廳公進揭帖白所辦事而

首事執揭帖者屬戶部司務李桂芳竟不至無手揭者無冠本班者八廳同糾候

旨先大人倉忙寄平安問示孤被糾本末毋以訛傳爲高堂震不旬日而爲庸醫所悞竟至不錄棺殮無辦賴執友應太室先生獨綱紀周卹之旋又陸正伯先生以尺一訃其言曰是月十六

日

上御朝鴻臚寺招呼各衙門司務過儕趨而前則領班而手揭帖竟不至

天顏咫尺事出翔遭司儀不糾未至而糾在班行者時入廳宜入班者十有二人而領班一人餘六人都不至獨朝參五人反糾而待罪

朝房宗本朝罷趨慰之但見中官豸繡鴻臚環匝而問不至者某耶某耶同事者抗言某某奚不至奚不糾耶尊翁正色曰吾曹失儀當糾首事不至當問他何訊焉一再厲聲色乃遷延退彼七君子者微尊公不免矣不佞歸誠兒子曰沈無回老伯倉皇擾攘時應對數言俾

主上不訝羣臣強半懶朝參也以徵其識未嘗失儀而謂失儀歸過於己以昭國體不以偶誤爲同事愆以徵雅量紛紜中片言而同官強半賴之徵仁言之利溥非凡可及此細微一事耳尋得

旨免寃十九日

廷謝大用宜不可量而不虞廿二日飲於萬都尉大山庄風露侵之初第體中微熱醫藥誤投至廿八日奄忽不祿三日而殮顏面如生爲朔之日

享

太廟既畢饗公卿寮庶爭造廬而哭拊膺頓足或  
曰介士或曰名世之士或曰儒雅風韻誰其嗣  
之又曰天不畱遺豪傑以助勦國步或曰高堂  
風燭篤孝之子日安得瞑亦有應者曰太夫人  
有不死之子而擁方輿之孫日安不瞑或曰廉  
吏徒自苦耳則又謂脩潔一生拮据亦一生則  
謂謀人而忠未始謀己謀國無乎不至未始謀  
主家則謂宜其未立家也而已品卓一時名高千

古不孝手之一慟幾絕今想像事實恍茫摧割  
無若就陸先生報訃一札述

朝中諸公卿達尊喪次慰唁問答宛在目前莫非  
先君行先君實也品脩於幽獨論定於蓋棺大  
較若斯不孝何敢沒也先大人生平不事家人  
生產而甘旨之供父母疾病之禱送死之大親  
族故人婚喪患難之急必竭心力傾囊橐不問  
明朝爨有無也一殫於先王父之喪再竭於王  
母孫之得未疾爲禱以代以禳以賽致孝以襄

雲堂集  
九  
大事中殫於通國之火而焚其居諸子弟友戚  
有吉凶緩急都爲傾盡歲出每浮束脯之入故  
尚多子錢平時嘗擬尅期償今竟賣志以吻嗟  
乎荷析薪者任父事猶或難之贖逋券者終父  
志孤不敢爲逆命悖德乃負荷綦艱矣一生手  
自評錄廿一史東坡全集獻徵集及諸子諸集  
數千卷歲辛酉一火頓盡乃指腹口占示不孝  
曰尚多燒不盡他人未許知惟官署中尚存刪  
選欲售梓者曰古文選明文選古詩選明詩選

古四六選明四六選四六偶巒賦勸四書先正  
文選詩經先正文選所著有四書說叢毛詩說  
通久已梓行紙爲之貴其未刻說叢補說通訂  
詩疏翼每謂門人及不孝孤曰名理日新心靈  
無盡吾安得執所至而自以爲是續刻第緩之  
迄未刻不自滿假如是居恒自矢士子必旁討  
百家精研宗指格物窮理務有指歸漢宋諸儒  
辯解語錄百有餘種有刪有駁有翼欲彙爲一  
家言而一炬之餘僅存什一百年而後誰復知

者痛忍言哉惟時藝曰桃花塢草北歸草博笑  
草靈鷲山初草續草三草餘草隆化寺草四書  
獲薪草詩藝全刻詩經獲薪草凡十有一種久  
爲諸及門傳刻更存未刻經書文四百餘首至  
於經濟書曰濟河議積米防倭議遺詩曰焚草  
已庚草存草遺文曰雪堂集共十卷亦皆梓行  
痛哉今所評廿一史諸書旣焚孤不可得見徒  
有父書而不能讀也著述之餘遊墨繪翰位置  
氣韻直徧古人間得真蹟則臨摹尋繹原本作  
者之意忘食忘寢必神會乃已每一幅成知好  
輒携去今罕存者父則善畫而子不克藏也先  
夫人執友三孤并不得事也痛可勝道哉蓋晚  
年交遊廣少時共硯席同藝業洽臭味者太學  
周谷王孝廉沈君接外父胡休復三先生耳周  
先生赴自粵東爲失七箸已而紀綱其喪振翼  
其嗣沒身不衰外父甫讀中秘書而卒於官文  
未殫其蘊經術未旣其猷猶吾父也去臘而君  
接先生又訃聞於京師先大人詩以哭之曰羨



君泉下反三人復自注曰應與谷王休復相晤  
生死之交情見乎詞情之所鍾一至於此嗚呼  
不知其人視其友三先生賦才不同所臻亦異  
而坦衷質行克已而忠謀其趨一也真父友也  
嗚呼孤不逮事吾父并不及事父之執友無已  
終讀父書已乎恐終不得肖也痛何時定也先  
君諱守正字允中更字無回別號雪菴中萬曆  
癸卯科浙江鄉試生隆慶壬申二月初二日辰  
時歿天啓癸亥三月廿八日戌時享年五十有

二元配謝曉亭公女子女存者長不孝孤尤含  
郡廩生娶翰林院庶吉士休復胡公女次美含  
娶太學行仲陸公女繼娶文學敬所嚴公女女  
一適沂州二守曙雲林公子邑庠生尚友孫男  
二翥宗聘吏部司務去病卓公孫女太學漢生  
公女尤含出翹宗美含出未聘孫女三尤含出  
者二美含出者一俱未字不孝孤習見祖先遺  
像黃髮皤皤私幸家世宜壽且先君精神氣魄  
宜未艾憶孫王母考終八十有四先大人皇皇

自咎由孺子德薄而先澤斬若先大人積學累  
行何等而竟若此孤兄弟罪逆可勝誅哉有百  
其身贖安從哉不孝孤生也晚少就外傳丙辰  
隨任黃巖所矜式或奉耳提摧裂涕洟中述先  
大人言行不百一猶憶先大人為某氏傳狀教  
不孝曰貌父母者倩名筆寫其真五官位置爭  
差毫釐為貌路人耳非其親也吾為某狀不敢  
諛以塗之人塞人親也不孝用不敢妄一溢詞  
失吾親以負先志惟

名公大人憐而賜之如椽先大人死且不朽孤兄  
弟死戴不朽

孤子

尤含  
美含

泣血稽顙百拜述

甥王克家頓首百拜填諱

學王宮家題道百世集

其血滋養百世

半張遺

奇公大人



